


# INVENTIO

## O circo, a maxia e a danza do espectáculo familiar 'Inventio' chegarán a Vigo este Nadal

O Auditorio Mar de Vigo acolleu unha presentación de *Inventio* na que participou parte do elenco artístico así como autoridades e entidades colaboradoras

Comedia, ilusionismo e artes circenses mestúranse nesta proposta para todos os públicos sobre o imaxinario Xacobeo

Os billetes para as funcións están á venda na web [teuticket.com](http://teuticket.com)



*Un momento da presentación de 'Inventio' en Vigo*

**Vigo, 13 de decembro do 2022.**- Aproveitando o inminente comezo das festas de Nadal, o elenco artístico de *Inventio* presentou esta mañá aos medios de comunicación un petisco do seu espectáculo no Auditorio Mar de Vigo. No acto tamén participaron **Marta Fernández-Tapias**, delegada territorial da Xunta de Galicia

CIRCO ILUSIONISMO DANZA MÚSICA

# INVENTIO

en Vigo; **Patricia Romani**, directora de Instituciones de CaixaBank en Galicia Sur; e mais **Martín Varela**, director creativo de *Inventio* e portavoz de Thinking Up Events. Ademais, a presentación contou coa presenza dun grupo de 50 alumnos de infantil e primaria do CEIP da Carrasqueira de Coruxo.

Na súa intervención Varela salientou que *Inventio* é un espectáculo familiar “cunha historia atractiva de gran profundidade e calado cultural, espectacular e apetecible, na que prima a calidade”. E sinalou que chegan a Vigo co desexo de “poñer un peche máxico ao Nadal e con moitas ganas de espallar na cidade olívica boas doses de circo, fantasía e danza”. Esta proposta escénica de gran formato concibida para público familiar brindará un total de tres funcións no Auditorio Mar de Vigo entre o mércores 3 e o xoves 4 de xaneiro. Os billetes están á venda na web [www.teuticket.com](http://www.teuticket.com). Ademais, hai desconto para os usuarios do Carné Xove e os menores de dous anos non pagan sempre que non ocupen butaca.

Concibido para todos os públicos, *Inventio* reborda humor, misterio e fantasía mais tamén é quen de mesturar con solvencia a comedia e o drama. Trátase dun convite para gozar cos sentidos dunha historia onde o pasado e o futuro danse a man grazas á sucesión de números de ilusionismo, levitacións, equilibrios, malabares, aéreos, audiovisuais e mais composicións de música tradicional galega fundidas con sons electrónicos. Cunha atmosfera máxica e unha posta en escena vangardista, *Inventio* recupera a paisaxe, os costumes, a música, a arte ou a arquitectura de Galicia nun espectáculo delicado e cegador, de busca e descubrimento. *Inventio* é un camiño de regreso á sensibilidade a partir da tradición e a modernidade.

Para materializar esta ambiciosa proposta escénica, *Inventio* conta cun numeroso equipo creativo e artístico formado por máis de 40 persoas, entre elas seis bailaríns e seis artistas circenses. Na dirección atópase o mago Martín Varela, que tamén exerce de guía do espectáculo. Como responsable da dramaturxia figura José L. Prieto e na dirección artística está Suso Montero. A dirección de maxia recae sobre os ilusionistas Fani Triana e Martín Camiña e a de circo en Jorge Miquel. A dirección musical leva o selo de José Trincado 'Triki' e o ballet e as coreografías son unha creación de Mercedes Suárez. Completan o equipo Alberto Casas no deseño de iluminación e Conchi Silvent na dirección de vestiario. *Inventio* é unha iniciativa da promotora galega Thinking Up Events, da Xunta de Galicia a través do programa Xacobeo 21-22 e mais da Fundación “la Caixa”, e conta tamén co apoio de Sargadelos.

**A HISTORIA.** Ano 2094. O noso mundo é branco, aséptico, limpo, ordenado. O noso universo é frío e tan impersoal coma o quirófano dun hospital. Deixamos de sentir e de comunicarnos. Aterramos no futuro, si, pero perdemos a memoria e a emoción. Galicia. Último ano Xacobeo deste século XXI. Unha *troupe* de doce artistas guiada por un ilusionista comproba que xa non existe o Camiño de Santiago, que xa ninguén o lembra. Non quedan peregrinos nin un camiño que percorrer xuntos. Tampouco a auga ou a chuvia, o son das gaitas, o verde dos campos ou a pegada do mar na area. Nin pegada nin lembranza ningunha. Que era todo aquilo? Onde quedaron a viaxe, a busca e o descubrimento? Onde liscou a sensibilidade? Velaquí as preguntas que van guiar a esa *troupe* circense que teima nunha misión: reconstruír a súa identidade cultural. Sobre as táboas, os artistas vense envoltos nunha aventura sen igual. O pasado tócaos maxicamente e unha forza sobrenatural transformaraos.

CIRCO ILUSIONISMO DANZA MÚSICA

# INVENTIO

*Inventio* nace co obxectivo de servir de vehículo de coñecemento e de divulgación do Camiño de Santiago e da cultura galega a través dunha historia de buscas e encontros, apta para público familiar e adulto. Trátase dun espectáculo que dota o noso patrimonio cultural dun enorme poder simbólico: tradicións nadas hai séculos que perduran hoxe, e que o fan enriquecidas e felizmente contaminadas doutras manifestacións artísticas, cunha ollada aberta que pon en valor o que nos constrúe e o que nos une.

Desde a súa estrea en Ferrol, o espectáculo está a desenvolver unha intensa xira que xa recalou en Santiago, Salamanca, Lugo, Pontevedra e Ourense e que vai chegar nas vindeiras semanas a Bilbao (29-30 decembro), Vigo (3-4 xaneiro 2023) e A Coruña (13-14 xaneiro). Toda a información actualizada sobre a xira e os billetes está dispoñible no espazo web [www.inventio.gal](http://www.inventio.gal).

#### Contacto de prensa INVENTIO

The Office Comunicación

Bea Pérez | 604 070 409 | [bea@theofficeco.es](mailto:bea@theofficeco.es)

Luisa Castiñeira | 620 113 155 | [luisa@theofficeco.es](mailto:luisa@theofficeco.es)

**Spot promocional:** <https://youtu.be/QP5losS2pnY>

**Kit de prensa *Inventio*:** <https://cutt.ly/Inventio>

#### Xira *Inventio* | Datas anunciadas

29 - 30 decembro | Teatro Campos Elíseos Antzokia | Bilbao

3 - 4 xaneiro 2023 | Auditorio Mar de Vigo | Vigo

13 - 14 xaneiro 2023 | Teatro Colón | A Coruña

[inventio.gal](http://inventio.gal) #inventiotour

#### Info práctica *Inventio* – Vigo

Auditorio Pazo de Congresos Mar de Vigo

Martes 3 de xaneiro | 17 h e 20.30 h

Mércores 4 de xaneiro | 17 h

Entradas: 15, 18, 20 e 25 euros máis gastos de xestión

Desconto Carné Xove | Entrada gratis para menores de 2 anos que non ocupen butaca

<https://www.teuticket.com/es/ver/inventio>